

CONVENIO DE COLABORACIÓN ENTRE A CONSELLERÍA DE EMPREGO, COMERCIO E EMIGRACIÓN E O CLÚSTER DA FUNCIÓN LOXÍSTICA DE GALICIA PARA A REALIZACIÓN DE ACCIÓNS FORMATIVAS DE CUALIFICACIÓN E RECUALIFICACIÓN DA POBOACIÓN ACTIVA EN SECTORES ESTRATÉXICOS E MELLORA DAS CAPACIDADES PARA A TRANSICIÓN ECOLÓXICA NO MARCO DO PLAN DE RECUPERACIÓN, TRANSFORMACIÓN E RESILIENCIA

Santiago de Compostela, na data da sinatura dixital

REUNIDOS

Dunha banda, José González Vázquez, conselleiro de Emprego, Comercio e Emigración, actuando en nome e representación da Xunta de Galicia, en virtude do Decreto 44/2024, do 14 de abril (DOG núm. 73, do 14 de abril), no exercicio das facultades que lle confire o artigo 34 da Lei 1/1983, do 22 de febreiro, de normas reguladoras da Xunta e da súa presidencia (DOG núm. 23, do 21 de marzo).

Doutra parte, a Asociación Clúster da Función Loxística de Galicia, e no seu nome e representación Xoán Martínez Reboredo, con DNI 36157250P, en calidade de presidente da mesma e con poderes suficientes para este acto segundo o recollido nos seus estatutos, con NIF G94.194.594 e enderezo no Edificio CEM – Cidade da Cultura, Monte Gaiás, s/n 15707 Santiago de Compostela, A Coruña.

Interveñen en función dos seus respectivos cargos en exercicio das facultades que, para convir en nome das entidades que representan, teñen conferidas

EXPOÑEN

Primeiro.- O Estatuto de Autonomía de Galicia, no seu artigo 29, atribúelle á Comunidade Autónoma, en concordancia co artigo 149.1.7ª da Constitución Española, a competencia para a execución da lexislación do Estado en materia laboral, asumindo as facultades, funcións e servizos correspondentes a este ámbito.

Segundo.- Segundo o artigo 29 do Decreto 147/2024, do 20 de maio, polo que se establece a estrutura orgánica da Consellería de Emprego, Comercio e Emigración (DOG núm. 101, do 27 de maio), a Dirección Xeral de Formación e Cualificación para o Emprego ten, entre outras, as competencias en materia de dirección, programación e xestión das actuacións da consellería en materia de cualificación e recualificación profesional ao longo da vida laboral e, singularmente, a coordinación da participación das entidades colaboradoras, con e sen ánimo de lucro, na execución e



desenvolvemento dos servizos de políticas activas de emprego, a través da colaboración público-privada.

Así mesmo, correspóndelle o fomento da relación constante co tecido produtivo que permita a definición de plans de cooperación sectoriais a través da formación modular e itinerarios personalizados e o desenvolvemento de programas de cualificación e recualificación da poboación activa, con atención prioritaria aos sectores claves tradicionais e a aqueles afectados pola transición verde e dixital para responder á súa recuperación e adaptación ás novas claves económicas, apoiando a orientación e a formación das persoas que traballan nestes sectores, para garantir a adecuación dos seus perfís profesionais ás necesidades e cambios que se producen no mercado laboral.

Terceiro.- Que o Clúster da Función Loxística de Galicia é unha asociación empresarial galega sen ánimo de lucro, cuxa misión é contribuír a unha maior eficiencia da función loxística de Galicia, promovendo a súa competitividade, cunha especial atención á innovación, á internacionalización e á formación das empresas que forman parte da súa cadea de valor. A agrupación industrial une esforzos e intereses de forma colectiva e transversal, para lograr que Galicia se sitúe como un polo loxístico de referencia global.

O Clúster da Función Loxística de Galicia é unha agrupación industrial aberta e participativa, coa vocación de unir os esforzos dos prestadores de servizos de transporte e loxística e das empresas demandantes destes servizos. Unha agrupación industrial transversal acorde á crecente relevancia da loxística como elemento fundamental de competitividade empresarial e territorial.

Ao ser unha entidade sen ánimo de lucro, os beneficios que obteña por calquera concepto destínanse exclusivamente ao cumprimento destes fins, sen que se poidan repartir entre as persoas asociadas nin outras persoas físicas ou xurídicas con interese lucrativo.

Cuarto.- Segundo o estudo elaborado en 2021 polo propio Clúster e a Universidade de Vigo, a actividade loxística representa na economía galega o 12,54 % do valor engadido bruto (VEB) e o 12,12 % dos empregos. Da porcentaxe do VEB asociado á loxística, o 35,6% corresponde á actividade desenvolvida polas empresas cuxa actividade principal é a loxística e o restante 64,4% á loxística realizada de forma interna por empresas cuxa actividade principal non é a loxística.

Quinto.- Pese ao crecemento da loxística en termos de facturación, valor engadido e xeración de emprego en Galicia, nos últimos anos estase detectando un déficit formativo en determinados perfís especializados, derivado tanto da escaseza de perfís cunha formación mínima como outros nos que non se está logrando o relevo xeracional necesario para garantir a viabilidade futura. Neste sentido, identifícase a necesidade de promover accións formativas especializadas e orientadas a temáticas



concretas demandadas polas empresas, para o que o Clúster ten realizado un estudo de necesidades e demandas entre os seus asociados. Neste sentido, cómpre destacar que esta situación identifícase tanto en empresas loxísticas e de transporte como en empresas de outros sectores nas que a función loxística xoga un papel relevante.

En todas elas, cómpre tanto a incorporación de novos profesionais ao sector como dotar ás persoas que xa están nel de recursos formativos que lles permitan unha reciclaxe adecuada para o seu desenvolvemento profesional, tendo en conta as novas tecnoloxías, técnicas e tendencias que se están impoñendo a nivel mundial.

Sexto.- Estas novas tecnoloxías están marcando o talento e capacidades demandadas polas empresas, de xeito que os profesionais deben adaptarse a unha revolución que non ten porque supoñer destrución de emprego, senón que suporá unha reconversión dos empregos de maior valor engadido. Nesa evolución son fundamentais a formación e a mellora da empregabilidade, para que os profesionais poidan dar resposta ás necesidades que lles require un mercado laboral tan dinámico.

Todo isto leva consigo a transformación dalgúns postos de traballo que deberán adquirir novas habilidades e coñecementos en materia tecnolóxica e que, debido a esa transformación tecnolóxica, ese tipo de perfís deberán manterse en constante formación.

Por eses motivos, entre os retos inmediatos do sector está a cualificación e recualificación profesional do persoal que permita abordar os procesos de transformación que se están producindo e que implican a transformación dalgúns postos de traballo. Neste sentido, o Estudo de tecnoloxías emerxentes para a transformación da formación para o emprego elaborado pola Consellería de Promoción do Emprego e Igualdade, coa finalidade de anticiparse ás consecuencias e efectos que van supoñer os procesos de transformación no mercado laboral e, polo tanto, na vida diaria das persoas traballadoras e das empresas, amosa nos seus resultados que se advirte a existencia dun déficit de persoas cualificadas nas novas tecnoloxías, o que fai necesario actuar en varios ámbitos, sendo un deles o da formación, sobre todo no que atinxe a dar resposta ao cambio na demanda de competencias e cualificacións que vai ter que afrontar o emprego nos próximos anos.

O estudo realizou unha análise e detección de necesidades formativas baseadas na implantación de 14 tecnoloxías emerxentes, especialmente potenciadas polo efecto da COVID-19, para tratar de prever os futuros requirimentos formativos que serán demandados desde o noso mercado de traballo nun total de 15 sectores, entre os que está o sector da loxística e o transporte.

Sétimo.- A actuación do Clúster da Función Loxística de Galicia, como entidade que aglutina ás empresas cun compoñente loxístico relevante en Galicia, constitúe unha alternativa coadxuvante da



acción pública cara a paliar o desequilibrio entre os niveis de cualificación da poboación activa e as necesidades futuras do mercado laboral. O Clúster da Función Loxística de Galicia, polos seus propios obxectivos, ten o coñecemento de base para anticiparse ás necesidades futuras e á mellora da formación, favorecendo e promovendo a capacitación profesional das empresas que o integran e que lles permita impulsar a súa produtividade e competitividade, e facer fronte así, ás oportunidades de negocio que os mercados ofrecen.

Oitavo.- O Consello Europeo aprobou o 21 de xullo de 2020 o instrumento financeiro Next Generation EU, que inclúe como elemento central o Mecanismo para a Recuperación e a Resiliencia (MRR), cuxa finalidade é apoiar o investimento e as reformas nos estados membros para lograr unha recuperación sostible e resiliente, permitindo levar a cabo reformas tanto a nivel nacional como en cogobernanza coas Comunidades Autónomas con competencias transferidas.

En liña co anterior, o Acordo do Consello de Ministros do 27 de abril de 2021 aprobou o Proxecto do Plan de Recuperación, Transformación e Resiliencia para España e este foi aprobado pola Comisión Europea o 16 de xuño de 2021.

Noveno.- O Plan de Recuperación, Transformación e Resiliencia inclúe como compoñente 20 o Plan estratéxico de Impulso á Formación Profesional, que supón a continuidade do Plan de Modernización da Formación Profesional. Entre as inversións dese compoñente 20 está a inversión 1, denominada "Reskilling y Upskilling de la población activa ligado a cualificaciones profesionales" entre cuxas liñas de actuación figura a número 4, que atende á formación en competencias emerxentes, de rápida evolución e con perspectiva na xeración de emprego. Así mesmo, atende tamén á formación naqueles sectores que, como consecuencia da previsible evolución das condicións económicas e sociais, xerarán no futuro postos de traballo.

O 10 de xullo de 2024, a Secretaría Xeral de Formación Profesional do Ministerio de Educación, Formación Profesional e Deportes comunica que, co fin de garantir o cumprimento dos obxectivos establecidos, se amplía o prazo de execución do programa de cooperación territorial "Reskilling y upskilling de la población activa", cuxo remate estaba inicialmente fixado para o 31 de decembro de 2024.

Décimo.- As actuacións incluídas no Plan de Modernización da Formación Profesional execútanse, entre outros, a través dos créditos que se distribúen ás Comunidades Autónomas, financiándose esas actuacións co Mecanismo de Recuperación e Resiliencia da Unión Europea, establecido polo Regulamento (UE) 2020/2094 do Consello, de 14 de decembro de 2020, polo que se establece un Instrumento de Recuperación da Unión Europea para apoiar a recuperación tras a crise da COVID-19 e



rexido polo Regulamento (UE) 2021/241 do Parlamento Europeo e do Consello de 12 de febreiro de 2021.

Na sesión ordinaria da Conferencia Sectorial de Formación Profesional para Persoas Traballadoras do 17 de xullo de 2024 adquiriuse o compromiso por parte do Ministerio de Educación, Formación Profesional e Deportes de atender a petición da Comunidade Autónoma de Galicia de fondos adicionais para accións de reskilling e upskilling.

Décimo primeiro.- O artigo 19.4.c da Lei 9/2007, do 13 de xuño, de subvencións de Galicia (en adiante, Lei de subvencións) e, do mesmo xeito, os artigos 36.c e 40.1 do Decreto 11/2009, do 8 de xaneiro, polo que se aproba o Regulamento da lei (no sucesivo, Regulamento da Lei de subvencións), prevén a concesión directa de subvencións cando se acrediten razóns de interese público, social ou económico.

O procedemento para a concesión directa de subvencións establécese no artigo 26 da Lei de subvencións, no que se prevén os convenios como o instrumento habitual para canalizar as subvencións nominativas.

En base a razóns de interese social e de conformidade co previsto no artigo 26.2 a) da Lei de subvencións, estímase xustificada a non procedencia de promover a concorrência pública para a subscripción deste convenio, xa que a Asociación Clúster da Función Loxística de Galicia ten a condición de entidade representativa do sector da loxística e o transporte; posúe un amplo coñecemento deste, posto de manifesto nas funcións que ven desenvolvendo e integra entre os seus membros ás empresas que forman parte do ramo, resultando, en definitiva, un axente idóneo.

Así mesmo, de acordo co establecido no artigo 47.1 da Lei 40/2015, do 1 de outubro, de réxime xurídico do sector público e no artigo 6 da Lei 9/2017, do 8 de novembro, de contratos do sector público, as actividades obxecto do convenio non teñen carácter contractual xa que a colaboración que regula este instrumento xurídico ten como fin o cumprimento dos obxectivos que comparten as entidades participantes, cuxo desenvolvemento se guía por consideracións relacionadas co interese público.

En virtude do anterior, e acreditado que a Asociación Clúster da Función Loxística de Galicia cumpre cos requisitos establecidos para obter a condición de beneficiario, segundo o artigo 10 da Lei de subvencións, ambas as dúas partes acordan subscribir o presente convenio de acordo coas seguintes



CLÁUSULAS

Primeira.- Obxecto do convenio

1. O obxecto deste convenio é establecer as condicións polas que se rexerá a colaboración entre a Consellería de Emprego, Comercio e Emigración e a Asociación Clúster da Función Loxística de Galicia para a realización de accións formativas de carácter non formal de cualificación e recualificación da poboación activa no sector da loxística e o transporte, que se axusten ás necesidades máis inmediatas da formación do capital humano das empresas do ramo e permitan a actualización das competencias profesionais ou a adquisición doutras novas no marco sectorial e empresarial do sector e que, con carácter orientador, se recollen no Anexo I deste convenio.

2. Ademais, poderán realizarse accións de acompañamento para o procedemento de acreditación das competencias como poden ser, entre outras, a información e difusión dese procedemento, a asistencia para a configuración do portafolios documental da persoa candidata, a asistencia para a inscrición no procedemento e calquera outra acción que pida contribuír á acreditación das competencias profesionais. En todo caso, ese acompañamento limitarase a aquelas persoas que participen na acción formativa e así o soliciten.

Segunda.- Marco normativo específico de aplicación ao Convenio relativo ao Plan de Recuperación, Transformación e Resiliencia.

O marco normativo básico reitor deste instrumento, sen prexuízo da normativa en materia de subvencións, e especificamente no relativo ao Plan de Recuperación, Transformación e Resiliencia, financiado pola Unión Europea-Next Generation, ven representado polas seguintes disposicións:

- **Regulamento (UE) 2020/2094**, do 14 de decembro de 2020, polo que se establece un Instrumento de Recuperación da UE para apoiar a recuperación tras a crise da COVID-19
- **Regulamento (UE) 2021/241**, do 12 de febreiro, polo que se establece o Mecanismo de Recuperación e Resiliencia (MRR)
- **Plan de Recuperación, Transformación e Resiliencia** (PRTR) de España (aprobado o 16/06/2021 por Decisión do Consello de Europa)
- **Real decreto lei 36/2020**, do 30 de decembro, polo que se aproban medidas urxentes para a modernización da Administración pública e para a execución do PRTR



- **Lei 9/2021**, do 25 de febreiro, de simplificación administrativa e de apoio á reactivación económica de Galicia
- **Orde HFP/1030/2021**, do 29 de setembro, pola que se configura o sistema de xestión do PRTR
- **Orde HFP/1031/2021**, do 29 de setembro, pola que se establece o procedemento e formato da información a proporcionar polas Entidades do Sector Público Estatal, Autonómico e Local para o seguimento do cumprimento de fitos e obxectivos e de execución orzamentaria e contable das medidas dos compoñentes do PRTR.
- **Orde HFP/55/2023**, do 24 de xaneiro, relativa á análise sistemática do risco de conflito de interese nos procedementos que executan do Plan de Recuperación, Transformación e Resiliencia.

Terceira.- Financiamento e contía da subvención

1. A Consellería de Emprego, Comercio e Emigración achegará a cantidade total de catrocentos sesenta e nove mil seiscentos dez euros (469.610 €) con cargo á aplicación orzamentaria 44.03.323B.481.1 (código de proxecto 2022 00172) dos orzamentos xerais da Comunidade Autónoma de Galicia para o financiamento do obxecto do convenio e no marco do *"Plan de Recuperación, Transformación e Resiliencia – Financiado pola Unión Europea – NextGenerationEU"*, distribuída nas seguintes anualidades:

Anualidade	Orzamento
2024	219.555 €
2025	250.055 €

Esta cantidade total poderá incrementarse como consecuencia dunha xeración, ampliación ou incorporación de crédito. A modificación do crédito dispoñible realizarase mediante a sinatura dunha addenda.

2. O importe do módulo por persoa formada será de 245 euros no caso de que sexa unha formación mínima de 30 horas e de 549 euros por persoa formada para o caso de que sexa unha acción formativa de 60 horas, sendo eses importes proporcionais ao número de horas maiores de 30 e menores de 60 horas, en base a aplicación dun axuste lineal. O módulo máximo de subvención será con independencia de que a acción formativa teña unha duración superior ás 60 horas.

Entenderase por persoa formada toda aquela que finaliza a acción formativa. Na modalidade presencial considerarase persoa alumna formada aquela que asista ao 80% das horas da dita acción formativa. Aquelas persoas inscritas na acción formativa, pero que non a finalizaran, considerarase



como gasto subvencionable ao 15% do módulo aplicable, debendo acreditarse, no seu caso, a inscrición formal e a realización de, polo menos, un 15% das horas totais da acción formativa.

No caso da modalidade de teleformación, entenderase como persoa alumna formada aquela que supere a totalidade dos controis propostos da correspondente acción, sempre que acredite unha permanencia mínima de conexión do 30% das horas do curso.

Cuarta.- Gastos subvencionables

1. O importe da subvención destinarase a cubrir os gastos efectivamente realizados pola entidade relativos aos seguintes conceptos subvencionables ao abeiro deste convenio, conforme aos artigos 28 e 29 da Lei de subvencións, así como ao establecido no artigo 17 do Regulamento (UE) do Parlamento Europeo e do Consello, 2021/241, non tendo o carácter de recorrente. Serán susceptibles de formar parte do módulo de gasto por persoa formada, os seguintes:

a) Gastos dirixidos á formación para a cualificación e recualificación da poboación activa no sector da loxística e o transporte a través de accións formativas referenciadas no Catálogo Nacional de Cualificacións Profesionais, incluíndo todos os custos indubidablemente vinculados á formación, tales como gastos organizativos, gastos directos e indirectos que puideran xerarse como consecuencia da programación, difusión, implementación, seguimento, avaliación e certificación das actividades formativas, gastos do persoal formador, gastos de alugamento, infraestruturas físicas ou telemáticas e outros gastos asociados.

b) Gastos asociados ao acompañamento para a avaliación e acreditación das competencias profesionais adquiridas pola experiencia laboral, de ser o caso.

2. O conxunto dos gastos recollidos no apartado anterior desta cláusula non poderán superar, para o total de persoas formadas, a contía modular establecida no apartado segundo da cláusula terceira deste convenio.

3. O importe destas subvencións non constitúen unha axuda de Estado nos termos previstos nos artigos 107 e 108 do Tratado de Funcionamento da Unión Europea (TFUE), dado que as medidas obxecto do presente convenio realízanse no ámbito da educación pública, polo que se considera actividade non económica, ámbito exento das axudas de Estado, segundo o apartado 2.5 da Comunicación da Comisión relativa ao concepto de axuda estatal conforme ao disposto no artigo 107, apartado 1, do Tratado de Funcionamento da Unión Europea.



Quinta.- Subcontratación

1. A entidade beneficiaria poderá subcontratar ata o 100% da acción formativa, de acordo co establecido no artigo 27 da Lei de subvencións e o artigo 43 do Regulamento da Lei de subvencións.

2. Para o caso de que a impartición da formación se efectúe a través da contratación con outra entidade, cando o importe do gasto subvencionable supere as contías establecidas para os contratos menores no artigo 118 da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, a entidade beneficiaria deberá solicitar, como mínimo, tres ofertas de diferentes provedores non vinculados entre si, con carácter previo á contratación do servizo, salvo que, polas súas especiais características, non exista no mercado suficiente número de entidades que as realicen, presten ou subministren, nos termos do artigo 29 da Lei de subvencións. As ofertas presentadas deberán conter os mesmos conceptos ofertados.

No caso de renuncia dunha ou máis das entidades que presentaran as ofertas, estas deberán ser substituídas por outras ata acadar o mínimo de tres exixido.

A elección entre as tres ofertas presentadas, que se deberán achegar na xustificación, realizarase conforme criterios de eficiencia e economía, e deberase xustificar expresamente nunha memoria a elección cando non recaia na proposición económica máis vantaxosa.

3. Cando a actividade concertada con terceiros sobrepase do 20 por cento do importe da subvención e este importe sexa superior a 60.000 euros, a subcontratación estará sometida ao cumprimento dos seguintes requisitos:

a) Que o contrato se celebre por escrito.

b) Que a celebración deste se autorice previamente pola entidade concedente da subvención.

4. En ningún caso se poderá concertar, total ou parcialmente, a prestación ou adquisición de servizos ou subministracións necesarios para a execución da actividade subvencionada cunha persoa ou entidade vinculada coa entidade beneficiaria, salvo que concorran as seguintes circunstancias:

1ª. Que a contratación se realice de acordo coas condicións normais de mercado.

2ª. Que se obteña a autorización previa da Dirección Xeral de Formación e Cualificación para o Emprego.

Entenderanse por empresas vinculadas aquelas que se atopen nalgunha das situacións previstas no artigo 43 do Regulamento da Lei de subvencións.



A carga da proba de que a contratación se realiza en condicións normais de mercado corresponderá á entidade beneficiaria. A Administración actuante determinará a suficiencia ou insuficiencia da xustificación presentada.

5. Imputaranse a este concepto os gastos de subcontratación exclusivamente derivados da actuación que se axusten ao establecido no artigo 27 da Lei de subvencións. Non poderá realizarse a subcontratación con persoas ou entidades nas que concorran algunha das circunstancias consignadas no artigo 27.7 da Lei de subvencións.

O importe facturado pola empresa subcontratada, en relación cos custos nos que incorra para a prestación do servizo, non poderá superar as porcentaxes de gastos xerais de estrutura do contrato de obra que estableza a Lei de orzamentos xerais da Comunidade Autónoma de Galicia para o ano 2025, en virtude da previsión establecida no artigo 131.1 do Regulamento da Lei de contratos das administracións públicas.

6. No caso de que se subcontrate todo ou parte da acción formativa, deberán de preverse os mecanismos para asegurar que os subcontratistas cumpran co principio de "non causar un prexuízo significativo ao medio ambiente" así como o previsto no artigo 8 da anteriormente citada Orden HFP 1030/2021, do 29 de setembro (Anexo II).

7. Nos contratos que se subscriban para acordar a subcontratación, deberá acreditarse que se recollen as garantías precisas para o tratamento de datos de carácter persoal, debendo incluír as cláusulas necesarias para o seu cumprimento, consonte ao establecido na Lei orgánica 3/2018, de 5 de decembro, de Protección de datos persoais e garantía dos dereitos dixitais.

Sexta- Xustificación e pagamento

1. A xustificación da subvención realízase a través do réxime de módulos, de acordo co establecido nos artigos 52 a 55 do Regulamento da Lei de Subvencións, e os artigos 76 a 79 do Real Decreto 887/2006, do 21 de xullo, polo que se aproba o Regulamento da Lei 38/2003, do 17 de novembro, Xeral de Subvencións (en diante, Regulamento da Lei xeral de subvencións). Para implementar este réxime de módulos, neste convenio tivéronse en conta como referencia os módulos económicos que por parte da Secretaría Xeral de Formación Profesional do Ministerio de Educación, Formación Profesional e Deportes se estableceron para subvencionar accións formativas desta liña de cualificación e recualificación no marco do compoñente 20 do Mecanismo de Recuperación e Resiliencia.



2. A Asociación Clúster da Función Loxística de Galicia presentará a xustificación do cumprimento das actuacións subvencionadas e dos gastos realizados mediante o réxime de módulos en relación coas accións formativas executadas ata o 30 de novembro de 2024, con prazo máximo o 17 de decembro de 2024.

Segundo o artigo 29 da Lei de subvencións os gastos vinculados á formación deben ser aboados con data límite o 16 de decembro de 2024.

A xustificación correspondente a 2025 comprenderá as accións realizadas desde o 1 de decembro de 2024 ata o 31 de marzo de 2025 e presentarse, con prazo máximo, o 16 de abril de 2025.

Neste suposto e de acordo co citado artigo 29 da Lei de subvencións, os gastos vinculados á formación deben ser aboados con data límite o 15 de abril de 2025.

A documentación presentase ante a Dirección Xeral de Formación e Cualificación para o Emprego da Consellería de Emprego, Comercio e Emigración, asinada pola persoa con capacidade da entidade.

3. A xustificación presentase por vía telemática, de acordo co artigo 14.2 da Lei 39/2015, do 1 de outubro, do procedemento administrativo común das Administracións Públicas, e incluírá a seguinte documentación, que deberá presentar a entidade beneficiaria para xustificar os obxectivos e fitos aos que se da cumprimento coa axuda concedida, de conformidade cos mecanismos de verificación establecidos:

a) Unha memoria de actuación xustificativa do cumprimento das obrigas establecidas no convenio, con indicación das actividades realizadas e dos resultados obtidos.

b) Unha memoria económica xustificativa que conterá, como mínimo, os seguintes extremos:

1.º Acreditación ou declaración polo beneficiario do número de unidades físicas consideradas como módulos, é dicir, o número de participantes que remataron a acción formativa e, se é o caso, as accións de acompañamento para o procedemento de acreditación das competencias.

2.º Contía global da subvención xustificada, calculada sobre a base das actividades cuantificadas na memoria de actuación presentada conforme aos módulos contemplados no apartado segundo da cláusula cuarta do presente convenio. A liquidación da subvención realizarase en función das persoas participantes que remataron a totalidade da acción formativa. A liquidación non poderá superar a contía global da subvención concedida prevista no apartado primeiro da cláusula terceira do convenio. O cálculo realizarase considerando o número de participantes que remataron a acción formativa polo módulo económico correspondente.



Para a xustificación da actividade subvencionada achegaranse ademais unha memoria relativa ás persoas participantes na acción formativa xunto cunha certificación da entidade beneficiaria que inclúa a relación de persoas participantes por cada acción formativa, indicando para cada persoa o período de permanencia na acción formativa.

c) Declaración responsable de non exceder os límites na imputación de custos relativos á subcontratación da docencia a través dun servizo externo. Aplicarase para tal fin o disposto na Lei de orzamentos xerais da Comunidade Autónoma de Galicia para o ano 2025, en relación coas porcentaxes máximas de gastos xerais de estrutura do contrato de obra.

d) Para o caso de que a impartición da formación se efectúe a través da contratación con outra entidade, cando o importe do gasto subvencionable supere as contías establecidas para os contratos menores no artigo 118 da Lei 9/2017, do 8 de novembro, de contratos do sector público, memoria xustificativa da elección entre as tres ofertas presentadas cando a elección non recaia na proposición económica máis vantaxosa.

e) Calquera outra documentación xustificativa ou informes que, de acordo coa normativa nacional ou europea, resulten esixibles no marco do Plan de Recuperación.

Ao abeiro do disposto no artigo 55 do Regulamento da Lei de Subvencións, e no artigo 79 do Regulamento da Lei xeral de subvencións, os beneficiarios estarán dispensados da obrigaón de presentación de libros, rexistros e documentos de transcendencia contable ou mercantil ou calquera outra documentación xustificativa dos gastos realizados, sen prexuízo da obrigaón do beneficiario de conservar os documentos xustificativos da aplicación dos fondos recibidos, incluídos os documentos electrónicos, en tanto poidan ser obxecto das correspondentes actuacións de comprobación e control, segundo dispón o artigo 14.1. g) da Lei 38/2003, do 17 de novembro, xeral de subvencións (en diante, Lei xeral de subvencións), así como de calquera outra obriga derivada da normativa estatal ou da Unión Europea que así o esixa.

4. O persoal técnico da Dirección Xeral de Formación e Cualificación para o Emprego realizará a correspondente comprobación técnico-económica. No suposto de que a documentación presentada non cumpra cos requisitos sinalados neste convenio, conteña erros ou sexa insuficiente, requirirase á entidade beneficiaria a súa emenda.

Se da dita comprobación resultase o incumprimento, total ou parcial, dos fins para os que foi concedida a subvención, das obrigas previstas no convenio ou dos requisitos establecidos para a xustificación, comunicarase tal circunstancia á entidade beneficiaria xunto aos resultados da



comprobación técnica e económica e iniciárase, de ser o caso, o procedemento de reintegro total ou parcial da subvención.

Sétima.- Pagamentos anticipados e liquidación

Logo da sinatura do convenio, poderá solicitarse o pagamento en concepto de anticipo de ata o 80% da subvención total concedida.

Nos termos do artigo 63 do Regulamento da Lei 9/2007 de subvencións de Galicia, aprobado polo Decreto 11/2009, do 8 de xaneiro, os anticipos non poderán superar o importe da anualidade prevista en cada exercicio orzamentario e, polo tanto, o pagamento poderá ser dividido en dúas anualidades para respectar este límite.

Con anterioridade ao pagamento da parte de anticipo que corresponda no ano 2025, será necesario que estea xustificada a contía de anticipo percibida no ano 2024.

Os anticipos deberán ser solicitados polas entidades beneficiarias xunto coa seguinte documentación:

- Solicitud do pagamento anticipado.
- Declaración responsable segundo o previsto no artigo 31.7 da Lei de subvencións, e nos artigos 10, 11 e 12 do Regulamento da Lei de Subvencións, de que a entidade está ao día no cumprimento das obrigas tributarias e fronte á Seguridade Social e non ten pendente de pagamento ningunha outra débeda coa Administración pública da Comunidade Autónoma de Galicia.

De acordo co establecido no artigo 65.4.f) do Regulamento da Lei de Subvencións , en relación cos artigos 63.2 e 67 do mesmo corpo legal, a Asociación Clúster da Función Loxística de Galicia queda exonerada da constitución de garantías.

Respecto da liquidación final, será equivalente á cantidade resultante de deducir as contías dos anticipos percibidos dos gastos totais debidamente xustificadas.

Oitava .- Obrigas xerais das partes

A Asociación Clúster da Función Loxística de Galicia está obrigada a:

1. Desenvolver as actuacións recollidas neste convenio e que constitúen o seu obxecto, e xustificar a realización da actividade e o cumprimento da finalidade prevista.
2. Ser titular e suxeito pasivo de todas as obrigas tributarias á Administración e á Seguridade Social correspondentes ás accións das que se derive o pagamento de impostos, retencións e cotas que



implican as actuacións derivadas da execución do convenio e, en consecuencia, chegar a declaración responsable ou certificacións acreditativas de estar ao día no cumprimento das obrigas tributarias ou fronte á Seguridade Social e de non ter pendente de pagamento ningunha outra débeda co Administración pública da comunidade autónoma.

A Asociación Clúster da Función Loxística de Galicia autoriza á Consellería de Emprego, Comercio e Emigración á obtención de forma directa da acreditación do cumprimento das súas obrigas tributarias coa Axencia Estatal da Administración Tributaria, coa consellería competente en materia de facenda da Xunta de Galicia e coa Tesouraría Xeral da Seguridade Social, a través de certificados telemáticos.

3. Someterse ás actuacións de supervisión e control dos órganos da Administración do Estado e da Comunidade Autónoma e da Consellería de Emprego, Comercio e Emigración.

4. Facilitar toda a información que lle sexa requirida pola Dirección Xeral de Formación e Cualificación para o Emprego; pola Intervención Xeral da Comunidade Autónoma, o Tribunal de Contas e o Consello de Contas, no exercicio das súas funcións de fiscalización e control; así como das instancias comunitarias competentes a efectos dos fondos europeos do Mecanismo de Recuperación e Resiliencia.

5. Conservar a documentación xustificativa da aplicación dos fondos percibidos durante un período de cinco anos a partir do pago do saldo ou, a falta deste pago, da operación, segundo o artigo 22.2.f do Regulamento (UE) 2021/241, que remite ao respecto ao disposto no artigo 132 do Regulamento Financeiro).

6. Presentar, coa xustificación da realización das actividades obxecto deste convenio, unha declaración responsable de atoparse ao corrente no cumprimento das obrigas tributarias e fronte á Seguridade Social e de non ter pendente de pago algunha outra débeda coa Administración pública da Comunidade Autónoma, así como de non estar incurso en ningunha das prohibicións para obter a condición de beneficiario, establecidas no artigo 10 da Lei de subvencións, de conformidade co disposto nos artigos 10, 11 e 13 do Regulamento da citada lei.

7. Informar ao alumnado, con carácter previo ao inicio das accións formativas, do carácter non formal da formación a recibir e da necesidade da súa posterior acreditación a través dos procedementos que, en base ao Real Decreto 1224/2009, do 17 de xullo, permanecen abertos na Comunidade Autónoma de Galicia ou de aqueles que, no mesmo marco normativo, puideran arbitrarse de xeito singular.



8. Reintegrar a contía percibida no caso de incumprimento das condicións establecidas no convenio para a súa percepción.

9. Tratar dun xeito confidencial toda a información recibida directa ou indirectamente e a non utilizar ningún dato desa información de maneira distinta ao obxecto do presente convenio. Así mesmo queda obrigada a manter de forma confidencial e a non revelar ningún dato da información coñecida sen o consentimento previo da Consellería de Emprego, Comercio e Emigración.

10. Comunicar á Administración concedente a obtención doutras subvencións ou axudas para a mesma finalidade sen incorrer en dobre financiamento sobre o mesmo custo, procedentes de calquera outras Administracións ou entes públicos, nacionais ou internacionais.

A subvención regulada neste convenio será compatible con outras subvencións, axudas, ingresos ou recursos para a mesma finalidade, procedentes de calquera Administración ou entidade, pública ou privada. Deberá quedar, en todo caso, identificada nitidamente a trazabilidade dos gastos.

Conforme ao artigo 9 do Regulamento (UE) 2021/241 do Parlamento Europeo e do Consello, do 12 de febreiro de 2021, os proxectos financiados polo Mecanismo de Recuperación e Resiliencia poden recibir axuda doutros programas e instrumentos da Unión sempre que dita axuda non cubra o mesmo custo que os que xa financie a subvención deste programa.

11. En materia de publicidade e información, a entidade deberá cumprir coas seguintes obrigas:

a) As relativas ao financiamento do Mecanismo de Recuperación e Resiliencia, conforme á normativa europea e nacional que resulte aplicable. En particular, e en defecto de que se aprobe unha previsión máis específica ao respecto por orde ministerial do Ministerio de Facenda e Función Pública, nas medidas de información e comunicación das actuacións que desenvolvan inversións (carteis informativos, publicacións impresas e electrónicas, material audiovisual, páxinas web, anuncios e insercións en prensa, certificados, etc.), deberá incluírse o emblema da Unión Europea, que incorpora o texto <<Financiado por la Unión Europea-NextGenerationEU>>. Deberán terse en conta as normas gráficas e cores normalizadas establecidos no Anexo II do Regulamento de Execución 821/2014, polo que se establecen disposicións de aplicación do Regulamento (UE) Nº 1303/2013 do Parlamento Europeo e do Consejo no que se refire ás modalidades concretas de transferencia e xestión das contribucións do programa, á presentación de información sobre os instrumentos financeiros, ás características técnicas das medidas de información e comunicación das operacións e ó sistema para o rexistro e almacenamento de datos. Tamén se pode consultar a seguinte páxina web: <http://publications.europa.eu/code/es/es-5000100.htm> e descargar distintos exemplos do emblema en: https://europa.eu/european-union/about-eu/symbols/flag_es#download



b) As establecidas no artigo 15 da Lei de subvencións. Neste sentido, toda referencia en calquera medio de difusión sobre as actuacións obxecto do convenio deberá incluír que está financiada pola Consellería de Emprego, Comercio e Emigración e o Ministerio de Educación, Formación Profesional e Deportes.

O incumprimento desta obriga considerarase infracción leve, de acordo co artigo 54.c) da Lei de subvencións, e sancionarase cunha multa fixa nos termos previstos no artigo 57 da dita lei. Así mesmo, poderá ser causa de reintegro, de acordo co establecido no artigo 33.1.d) da norma, e no artigo 75 do Regulamento da citada lei.

12. A entidade beneficiaria deberá contribuír aos obxectivos de soberanía dixital e autonomía estratéxica da Unión Europea, así como garantir a cadea de subministro tendo en conta o contexto internacional e a dispoñibilidade de calquera compoñente ou subsistema tecnolóxico que poida formar parte da solución, mediante a adquisición, cando proceda, de equipos, compoñentes, integracións de sistemas e software asociado a provedores situados na Unión Europea.

13. As demais obrigas previstas no artigo 11 da Lei de subvencións.

Pola súa banda, a Consellería de Emprego, Comercio e Emigración colaborará no financiamento do custo das actuacións de conformidade co establecido na cláusula terceira.

De acordo co previsto no Plan de Recuperación, Transformación e Resiliencia, aprobado polo Consello de Ministros o 27 de abril de 2021 e no Regulamento (UE) número 2021/241 do Parlamento Europeo e do Consello, do 12 de febreiro de 2021, polo que se establece o Mecanismo de Recuperación e Resiliencia, en todas as fases do deseño e execución dos proxectos, a Administración comprométese a garantir o cumprimento do principio de “non causar dano significativo” (principio “do no significant harm – DNSH”) e o relativo a etiquetaxe verde e dixital.

Así mesmo, en orde a dar cumprimento a obriga de prevención, detección e persecución da fraude, a corrupción e o conflito de intereses como refire o artigo 6 da Orde HFP/1030/2021 conforme ao previsto no artigo 22 do Regulamento (UE) 2021/241 do Parlamento Europeo e do Consello, do 12 de febreiro do 2021, en relación coa protección dos intereses financeiros da Unión Europea, sublíñase a existencia da canle de denuncias do Servizo Nacional de Coordinación Antifraude (SNCA), que resulta aplicable para todo proxecto ou operación financiado total ou parcialmente con cargo a fondos procedentes da Unión Europea (<http://www.conselleriadefacenda.es/areas-tematicas/planificacion-e-fondos/periodo-comunitario-2014-2020/medidas-antifraude/snca-olaf>), como sinala a Comunicación 1/2017, de 6 de abril, do dito Servizo co obxectivo de que calquera persoa que teña coñecemento de feitos que poidan ser constitutivos de fraude ou irregularidade en relación cos proxectos financiados



con cargo a fondos procedentes da Unión Europea, podan poñelos en coñecemento do devandito Servizo.

Novena.- Características e execución da actividade formativa

1. As accións formativas, de carácter non formal, deberán identificar nos seus contidos formativos a unidade ou unidades de competencia das cualificacións profesionais incluídas no Catálogo Nacional de Cualificacións Profesionais na que se describen as realizacións profesionais para as que se oferta a formación, de xeito que se permita a súa futura acreditación formal a través do procedemento de recoñecemento da competencia profesional adquirida pola experiencia laboral e outras vías non formais de formación recollido no Real Decreto 659/2023, do 18 de xullo, pola que se desenvolve a ordenación do Sistema de Formación Profesional.

Así mesmo, deberán estar relacionadas coas actividades e profesións que se encadran dentro do sector estratéxico ao que pertence a entidade, co obxectivo de promover unha oferta formativa que dea resposta ás demandas de competencias e cualificacións dentro dun mercado laboral incurso en procesos de transformación dixital e de innovación.

2. Todas as accións formativas que se programen contarán cun mínimo de 30 horas e un máximo de 60 horas de formación non formal.

3. O prazo de execución das accións a desenvolver ao abeiro deste convenio comprenderá dende o 2 de setembro de 2024 ata o 31 de marzo de 2025.

4. A formación poderá realizarse de modo presencial, teleformación ou mixta.

Na modalidade presencial poderá empregarse a aula virtual, que sempre deberá ser o "Campus Virtual de formación para o emprego" que a Consellería de Emprego, Comercio e Emigración poñerá ao seu dispor. Nestes supostos será necesario que todos os alumnos cumpran os requisitos técnicos requiridos, incluíndo o mantemento da cámara web acesa en todo momento.

Na modalidade de teleformación o uso do "Campus Virtual de formación para o emprego" será opcional. As plataformas de teleformación alternativas deberán cumprir os criterios técnicos e de calidade que se especifiquen nas instrucións para a xestión das accións formativas deste convenio e deben estar a disposición da Dirección Xeral de Formación e Cualificación para o Emprego ao menos durante os tres anos seguintes á finalización da formación, aos efectos de control e seguimento.

Para levar a cabo as sesións que requiran presenza física permitirase o uso das instalacións dos centros propios de formación profesional para o emprego dependentes da Consellería de Emprego,



Comercio e Emigración, sempre e cando sexa posible e non incida na programación de accións formativas do centro.

A participación do alumnado nas accións formativas a impartir na modalidade presencial, tanto nun lugar físico como en aula virtual, ou na parte presencial da modalidade mixta non será superior a 8 horas diarias e 40 semanais.

5. A Asociación Clúster da Función Loxística de Galicia comprométese a empregar a aplicación SIFO para a execución das accións formativas, na que rexistrarán o calendario de realización das accións formativas, a relación do alumnado e profesorado e as súas asistencias por acción formativa e día.

Na modalidade presencial, o control de asistencia realizarase mediante o uso dun sistema de identificación seguro e unívoco baseado en código QR e/ou DNI-e, que identifique as persoas participantes.

O control deberá realizarse diariamente ao inicio e ao remate de cada sesión, de ser a acción formativa en horario de mañá ou de tarde, e catro veces ao día, de impartirse a acción formativa en xornada partida, ao inicio e ao fin da sesión de mañá e ao inicio e ao remate da sesión de tarde.

Tanto o conxunto do alumnado como o persoal docente estarán obrigados a efectuar o referido control de presenza.

No caso de que non se atopen en funcionamento os anteriores sistemas no momento de executar a formación, e durante o estrito período da súa posta en marcha, así como nos supostos de producirse fallos no sistema ou imposibilidades acreditadas de empregar os medios de control citados, utilizaranse partes diarios de asistencia, que deberán identificar as persoas participantes e expresar as horas realizadas en cada sesión por cada unha delas, e reflectir expresamente o número de horas de ausencia.

Estes documentos deberán subirse á aplicación informática Sifo, asinados polo persoal formador e a persoa responsable da entidade. Neste suposto, o centro deberá mecanizar as asistencias en COBIPE, no prazo improrrogable de 3 días hábiles desde a impartición da sesión á que se refiran.

Na formación presencial desenvolvida mediante aula virtual os datos de asistencia do alumnado e persoal docente deberán ser mecanizados pola entidade beneficiaria na aplicación informática COBIPE, no prazo improrrogable de 3 días hábiles desde a impartición da sesión á que se refiran.

A Consellería de Emprego, Comercio e Emigración poderá, en calquera momento, dentro do período de vixencia do convenio de colaboración, e mediante a oportuna instrución, que será comunicada ás entidades beneficiarias, substituír a obriga de mecanización establecida no parágrafo anterior por



unha carga automática en COBIPE do tempo de conexión que para cada sesión, persoa alumna e acción formativa consten no campus virtual.

6. O inicio das accións formativas requirirá a validación previa, a través da aplicación informática SIFO, do cumprimento de requisitos e condicións por parte do persoal técnico da unidade administrativa competente.

Non poderá iniciarse ningunha acción formativa se non se reúne un mínimo de 5 persoas alumnas o primeiro día e, para a modalidade de teleformación, o número máximo de participantes será de 80 persoas por acción formativa.

7. Na formación impartida na modalidade de teleformación, realizarase como mínimo unha avaliación cada 15 horas, de xeito que se acredite que o alumnado realizou o itinerario formativo de acordo coa secuencia deseñada para os contidos da acción formativa e que realizou os exercicios e/ou probas que se determinen pola entidade. Para acreditar a superación da acción formativa requirirase unha permanencia mínima de conexión do 30% das horas do curso.

8. Establécese a obriga de contratar un seguro de accidentes para o alumnado, para o caso das accións formativas que se van impartir na modalidade presencial, así como para a parte presencial da modalidade de teleformación e/ou mixta, que cubra tanto os riscos que poidan ter durante o desenvolvemento do curso como os do traxecto en concepto de desprazamento ao lugar de impartición das clases teóricas, prácticas, visitas didácticas, titorías e probas presenciais.

A súa duración abranguerá o período da acción formativa, incluíndo expresamente as prácticas en empresas cando estas se realicen, sen que se poida admitir restrición nin exclusión ningunha por razón do medio de transporte utilizado. Non se admitirán pólizas con franquías.

O seguro deberá ter a seguinte cobertura mínima:

a) No caso de morte: 60.000 €.

b) No caso de invalidez permanente: 60.000 €.

c) Asistencia médico-farmacéutica: durante un ano a partir do sinistro.

Así mesmo, será obrigatorio contratar unha póliza de responsabilidade civil para facer fronte aos riscos que poidan derivar para os bens e as persoas cando se realicen prácticas en empresas ou outras actividades relacionadas co curso. Non se admitirán pólizas con franquías.



Décima.- Inexistencia de relación laboral

A subscrición do presente convenio non implicará relación laboral ou de calquera outra natureza entre a Consellería de Emprego, Comercio e Emigración ou calquera organismo ou entidade dependente ou vinculado á mesma, e as persoas ou profesionais que desenvolvan as accións que constitúen o seu obxecto, de tal xeito que, por este concepto, non se lle poderá esixir a este departamento ningunha responsabilidade directa nin subsidiaria por actos ou feitos acaecidos no desenvolvemento deste.

Décimo primeira.- Resolución do convenio

Serán causas de resolución do Convenio, as seguintes:

- O incumprimento do seu obxecto.
- O incumprimento total ou parcial de calquera das cláusulas que nel se establecen.
- As modificacións das directrices de desenvolvemento sen contar coa previa autorización escrita da Consellería de Emprego, Comercio e Emigración.
- A decisión xudicial declarativa da nulidade do convenio.

Ademais, o incumprimento total dos fins do convenio, a non realización das actividades previstas ou o incumprimento da obriga de xustificación dará lugar á perda do dereito ao cobro ou, no seu caso, ao reintegro da totalidade da contía xa percibida.

Calquera outro incumprimento parcial dos fins do convenio ou da obriga de xustificación, dará lugar á perda do dereito ao cobro ou, no seu caso, ao reintegro ao Tesouro da Xunta de Galicia das contías xa aboadas na porcentaxe correspondente á inversión non efectuada ou non xustificada, cos xuros a que dean lugar, de conformidade coa normativa autonómica de aplicación e nos prazos máis perentorios que esta dispuxese.

Toda alteración das condicións tidas en conta para a subscrición do convenio e, en todo caso, a obtención concorrente de subvencións ou axudas outorgadas por outras Administracións ou entes públicos ou privados, nacionais ou internacionais, poderá dar lugar á modificación da contía contemplada no presente convenio.

Décimo segunda.- Comisión de seguimento

Para o seguimento do convenio e da súa execución, así como para propoñer solucións aos conflitos que poidan xurdir na aplicación e interpretación das cláusulas do convenio constituirase unha comisión paritaria de seguimento que estará integrada, por parte da Consellería de Emprego,



Comercio e Emigración, por dúas persoas funcionarias da Dirección Xeral de Formación e Cualificación para o Emprego, e dúas persoas por parte da Asociación Clúster da Función Loxística de Galicia.

A actuación da Comisión de Seguimento axustarase ao establecido nos preceptos básicos da Lei 40/2015, do 1 de outubro, de réxime xurídico do sector público, e á Lei 16/2010, de 17 decembro, de organización e funcionamento da administración xeral e do sector público autonómico de Galicia.

Décimo terceira.- Natureza xurídica, réxime xurídico e xurisdición competente

Este convenio ten natureza administrativa e queda fóra do ámbito da Lei 9/2017, do 8 de novembro, de contratos do sector público, que o exclúe expresamente.

Rexerase polas súas propias cláusulas e seralle de aplicación o réxime determinado pola Lei de subvencións; o Regulamento da Lei de subvencións; os preceptos básicos da Lei xeral de subvencións e o Regulamento da Lei xeral de subvencións; a Lei 1/2016, do 18 de xaneiro, de transparencia e bo goberno (DOG núm. 30, do 15 de febreiro); a Lei 39/2015, do 1 de outubro, do procedemento administrativo común das administracións públicas; a Lei 40/2015, do 1 de outubro, de réxime xurídico do sector público e polas demais normas de dereito administrativo aplicables.

As controversias derivadas da aplicación ou interpretación do presente convenio serán resoltas en última instancia pola persoa titular da Consellería de Emprego, Comercio e Emigración, cuxas resolucións poñen fin a vía administrativa. Contra eses acordos cabe interpoñer recurso contencioso-administrativo ante o Tribunal Superior de Xustiza de Galicia, de conformidade co disposto na Lei 29/1998, do 13 de xullo, reguladora da xurisdición contencioso-administrativa.

Décimo cuarta.- Publicidade do convenio

As partes asinantes deste convenio outorgan o seu consentimento para que os datos persoais e o resto das especificacións que constan nel sexan publicados no Portal de Transparencia e Goberno Aberto e no Rexistro de Convenios da Xunta de Galicia, de acordo co establecido no artigo 15 da Lei 1/2016, do 18 de xaneiro, de transparencia e bo goberno, no Decreto 126/2006, do 20 de xullo, polo que se regula o Rexistro de Convenios da Xunta de Galicia (DOG núm. 149, do 3 de agosto), e en concordancia cos artigos 14 e seguintes da Lei 19/2013, do 9 de decembro, de transparencia, acceso á información pública e bo goberno (BOE núm. 295, do 10 de decembro).



En cumprimento do disposto no artigo 20 da Lei xeral de subvencións, o texto do convenio e a información requirida no ordinal oitavo do devandito artigo será comunicado á Base de datos nacional de subvencións (BDNS).

Décimo quinta.- Protección de datos

As partes asinantes obríganse ao cumprimento do Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se deroga a Directiva 95/46/CE (Regulamento xeral de protección de datos), da Lei Orgánica 3/2018, do 5 de decembro, de Protección de Datos Persoais e garantía dos dereitos dixitais, do Real Decreto 1720/2007, do 21 de decembro, polo que se aproba o Regulamento de desenvolvemento da Lei Orgánica de Protección de Datos, e demais normativa vixente de aplicación en cada momento en materia de protección de datos.

Décimo sexta.- Réxime de modificación

O contido deste convenio poderá modificarse por mutuo acordo das partes, a través da sinatura dunha addenda.

Neste sentido e segundo o disposto no artigo 31.4 da Lei 14/2013, do 26 de decembro, de racionalización do sector público autonómico, os convenios subscritos pola Administración xeral da Comunidade Autónoma poderán ser obxecto de modificación cando teñan como finalidade o logro dos obxectivos de estabilidade orzamentaria e sustentabilidade financeira. Estas modificacións terán como fin a redución do volume das obrigas ou a ampliación do seu prazo de execución.

Décimo sétima.-Vixencia

O presente convenio terá vixencia dende a súa sinatura ata o 30 de xuño de 2025.

En calquera momento anterior ao remate do prazo previsto no parágrafo anterior, as partes asinantes do convenio poderán acordar de forma unánime a súa prórroga no Marco do Mecanismo de Recuperación e Resiliencia.



En proba de conformidade cos termos do convenio, as partes asinan o exemplar no lugar e data indicados na cabeceira.

O conselleiro de Emprego, Comercio e
Emigración

José González Vázquez

O presidente da Asociación Clúster da Función
Loxística de Galicia

Xoán Martínez Reboredo





Anexo I

Proposta formativa de referencia

(con referencia ao Catálogo Nacional de Cualificacións Profesionais)

ANUALIDADE 2024							
Denominación acción formativa	Referencia a CNCP	Horas	Número de alumnos	Número de edicións	Modalidade de impartición	Prezo por módulo	Custo
Axuda a obtención dos permisos de condución de vehículos pesados (módulo 1)	TMV455_2	60	20	4	Presencial. Físico	549 €	43.920 €
Axuda a obtención dos permisos de condución de vehículos pesados (módulo 2)	TMV455_2	60	20	4	Presencial. Físico	549 €	43.920 €
Axuda a obtención dos permisos de condución de vehículos pesados (módulo 3)	TMV455_2	60	20	4	Presencial. Físico	549 €	43.920 €
Business Intelligence con Power Bi, Desktop, Service E Mobile, Aplicada á Loxística	IFC748_2	50	30	1	Teleformación	448 €	13.440 €
Green Logistics: cálculo da pegada de carbono	COM078_3	40	40	1	Teleformación	346 €	13.840 €
Estiba da mercadoría	COM072_2	30	40	1	Teleformación	245 €	9.800 €
Sistemas de planificación de rutas nos diferentes sectores do transporte	COM091_3	30	40	1	Teleformación	245 €	9.800 €
Lexislación e normativa do transporte de mercadorías por estrada	COM091_3	55	30	1	Teleformación	498 €	14.940 €
Xestor de carga aérea	MF2214_2	60	25	1	Teleformación	549 €	13.725 €
Equipos de traballo e liderazgo	ADG020_3	30	50	1	Teleformación	245 €	12.250 €
TOTAL							219.555 €





ANUALIDADE 2025							
Denominación acción formativa	Referencia a CNCP	Horas	Número de alumnos	Número de edicións	Modalidade de impartición	Prezo por módulo	Custo
Axuda a obtención dos permisos de condución de vehículos pesados (módulo 1)	TMV455_2	60	20	2	Presencial. Físico	549 €	21.960 €
Axuda a obtención dos permisos de condución de vehículos pesados (módulo 2)	TMV455_2	60	20	2	Presencial. Físico	549 €	21.960 €
Axuda a obtención dos permisos de condución de vehículos pesados (módulo 3)	TMV455_2	60	20	2	Presencial. Físico	549 €	21.960 €
Renovación CAP	TMV455_2	35	20	4	Presencial. Físico	296 €	23.680 €
ADR. Transporte de mercadorías perigosas	TMV455_2	30	20	3	Presencial. Físico	245 €	14.700 €
Axuda á Obtención do permiso de condución EC	TMV455_2	30	15	1	Presencial. Físico	245 €	3.675 €
Operario de almacén con formación en manexo de carretillas e transpaletas	COM411_1	30	20	3	Presencial. Físico	245 €	14.700 €
Curso de Loxística e Transporte Internacional	COM091_3	50	30	1	Teleformación	448 €	13.440 €
Inglés para loxística	COM091_3	60	60	1	Teleformación	549 €	32.940 €
Intelixencia artificial aplicada á loxística	COM091_3	40	40	1	Teleformación	346 €	13.840 €
Habilidades de negociación	COM095_3	40	40	1	Teleformación	346 €	13.840 €
Comunicación e negociación eficaz	COM095_3	50	30	1	Teleformación	448 €	13.440 €
Metodoloxías áxiles de xestión de proxectos	COM315_3	40	40	1	Teleformación	346 €	13.840 €
Metodoloxía LEAN aplicada á loxística	COM315_3	36	40	1	Teleformación	306 €	12.240 €
Formación aduaneira	MF0242_3	40	40	1	Teleformación	346 €	13.840 €
TOTAL							250.055 €

